

14 APR 2000

Mahathir-Dua hala

DR MAHATHIR ADAKAN PERBINCANGAN DENGAN BEBERAPA PEMIMPIN G-77

Oleh: E Sivabalan

HAVANA, 14 April (Bernama) -- Perdana Menteri Datuk Seri Dr Mahathir Mohamad mengadakan perbincangan dengan beberapa pemimpin dunia, termasuk Presiden Indonesia Abdurrahman Wahid dan pemimpin Palestin Yasser Arafat pada acara sampingan Sidang Kemuncak Kumpulan 77 (G-77) di sini pada hari Khamis.

Selain Abdurrahman dan Arafat, Dr Mahathir juga menemui Presiden Mali Alpha Omar Konare, Presiden Algeria Abdul Aziz Bouteflika, Naib Perdana Menteri China Li Langing, Perdana Menteri Chad Nagoum Yamassoum, Perdana Menteri Belize Said Musa dan Naib Presiden Iran Dr Hasan Habibi.

Pada hari Rabu, Dr Mahathir mengadakan pertemuan dengan Presiden Namibia Dr Sam Nujoma.

Sidang kemuncak tiga hari itu yang menemukan kira-kira 60 orang pemimpin negara-negara membangun berakhir pada hari Jumaat.

Dr Mahathir dijangka pulang ke tanahair pada hari Jumaat.

Sementara itu, jurugambar dan jurukamera televisyen tempatan dan antarabangsa menghadapi masalah untuk pergi ke Pusat Persidangan Antarabangsa (ICC), tempat sidang kemuncak itu diadakan.

Masalah itu timbul apabila pemandu bas yang diatitkan oleh penganjur sidang kemuncak itu enggan membawa mereka ke ICC dari Pusat Akhbar Antarabangsa (IPC), yang terletak kira-kira enam kilometer dari ICC.

Hanya kereta-kereta rasmi dibenarkan masuk ke ICC.

Yang turut terjejas ialah jurugambar Bernama Rosli Hurmin yang tidak dapat membuat liputan perbincangan dua hala antara Dr Mahathir dan para pemimpin lain.

Tidak ada penjelasan diberikan mengenai tindakan 'mogok' itu oleh penganjur.

-- BERNAMA

ES AKD